

Protocol no. 77**Sezzüda da marcurdi, als 02 october 2013 19.30 – 23.15**

Preschaints: Albert Mayer, Andri Poo, Men Caviezel, Dumeng Jann, Marianne Werro-Lehmann e Marco Fallet (protocol).

Protocol

Ils protocols no. 75 e 76 da las sezzüdas da mardi, als 10 settember e da gövgia, als 19 settember 2013 vegnan approvats.

685 021 FABRICA
Dr. Iris Zürcher; Isolaziun externa e spostamaint da la saiv a Curtin Sot

Il schef da fabrica, Dumeng Jann, preschainta la fatschenda. La patruna da fabrica vaiva piazzà, sainza dumonda e permiss da fabrica, la saiv sül cunfin da la via cumünala. Seguond art. 35 da la ledscha da fabrica sto però la saiv demuossar üna distanza da 50 cm davent da la via. Uossa ais avantman la dumonda per spostar la saiv in möd chi correspuonda a la ledscha da fabrica.

Il cussagl conceda cun vusch unanima il permiss da fabrica sco manzunà i'l titul.

686 9 FINANZAS ED IMPOSTAS
Preventiv 2014 / decisiuns da princip

Il Cussagl tira seguaintas decisiuns in connex:

- Proposta a la radunanza da fixar il pè d'impostas sün 105% sco fin da qua.
- Da conceder l'augmaint dal s-chalin da pajas incl. ev. incharimaint analog al Chantun.

687 217.503.06 Sanaziun chasa da scoula
Surdatta da las lavuors

Il vicecapo, Andri Poo, preschainta la fatschenda: Seguond preventiv e proposta da la cumischiun pel proget surdà il cussagl las lavuors sco segua:

- a) Lavuors da planisaziun fisica da fabrica
Surdatta a la ditta Kuster + Partner, San Murezzan pella somma da fr. 13'000.--, net.
- b) Construcziun dal lift intern
Surdatta a la ditta AS Aufzüge, Son Gagl pella somma netta da fr. 50'705.90.
- c) Lavuors da planisaziun da ventilaziun e da s-chodimaint
La cumischiun ha decis da separar las lavuors da planisaziun e quellas d'execuziun. Uschè po gnir evità, cha la ditta chi executescha las lavuors nun ais a medem temp eir incumbensada culla planisaziun e la survaglianza da quellas. Cun quist va il cussagl d'accord.

d) Abitaziun dal pedel

Jon Domenic Vital abita quasi 40 ons in quell'abitaziun, sainza chi sun gnüdas effectuadas grondas lavuors da mantegniment sco culurir e.o.p. I vain uossa examinà, cura e quantinavant cha quellas lavuors dessan gnir effectuadas,

688 217 CHASA DA SCOULA
Plazza da pedel pella chasa da scoula

In vist'a la pensiun dal pedel Jon Domenic Vital, sülla fin da l'on da scoula 2013/14, propuon'il cussagl da scoula da publichar a temp la plazza per ün nouv pedel. Il Cussagl decida da publichar la plazza.

La discussiun demuossa, cha la persuna sto accumplir in mincha cas seguaintas pretaisas:

- Esser in possess da la scolaziun da professiun da pedel obain lura s'obliar da frequentar quella.
- La plazza s'inclegia ad ün pensum da 100% e la persuna ha da surtour la plaina responsabilità pels stabiliments da scoula. A lunga vista resp. in üna seguonda fasa ais previs da stender la surveglianza eir amo pels ulteriurs stabiliments cumünals. Quai succeda cun üna valutaziun plü profuonda, ingio chi's vezza lura per quants pertschients cha la lezcha sto gnir augmantada.

In quist sen surpiglia Andri Poo, schef dal dicasteri scoula, da rediger la publicaziun, la quala il cussagl po amo consultar. A regard la cumischiun da tscherna gnarà preschantad'a temp ütil üna proposta.

689 830 TURISSEM
Zona da quietezza god Darsüra

Il vicecapo, Andri Poo, orientesch'in fatschenda. L'intent ais cler, i's vuless confermar la decisiun da la radunanza cumünala dal 2004.

Plünavant riv'il cussagl a la conclusiun da propuoner però a la radunanza da dar liber a Jachen Mosca l'access pro seis bain davent da la via. Cun quella masüra füss scholta la problematica.

690 720 ALLONTANAMANT D'IMMUNDIZCHAS
Erica Clalüna; lavuors da pulizia a Sala

Duonn'Erica ha uossa'inoltrà la desitta eir in scrit, quai davo ch'ella vaiva demischiunà a bocca la lezcha manzunada survart. Ad ella vain ingrazchà in scrit tilla surdond ün preschaint da recugnuschentscha.

691 011 LEGISLATIVA
Radunanza cumünala dals 17 oct. / orientaziun proget da fusiun

Il Cussagl discuta, schi nu dess gnir lantschà ün fögl in mincha chasada chi infuormescha resp. rend'attent als votants che puncts e dumondas chi vegnan in prüma lingia discutats a chaschun da quella radunanza.

El decida da cumbinar quai cul Mas-chalch, chi vain oramà edi in möd immediat per mantgnair il termin.

Qua ais eir da manzunar, cha la cumischiun da proget ha salvà güst hoz ün'ulteriura dieta pel proget e cha'l rapport vain miss in net e sarà avantman als 14 october. A partir dals 15 october sto quel lura eir gnir piazzà sülla pagina d'internet dal cumün. Cun quist vain it d'accord.

Immundizchas – molocs Plazzetta

M. Werro, cusgliera dal dicasteri, orientescha d'avair muni ils molocs cun tachöls cunter la savur. A regard la canera (vaider) exista la pussibilità da munir il moloc cun ün gummi, quai chi'd ais eir previs. Ultra da quai sto gnir cumprà ün ulteriur sach pel s-chart, chi serva lura per müdar oura e lavar da temp in temp ils sachs existents, quai ün'ulteriura masüra cunter la savur. Il Cussagl va d'accord in chosa e conced'el credit necessari da far. 800.00 per quel sach. Cun quistas masüras ais el persvas d'avair aderi a las reclomaziuns dals tangats e d'avair fat il pussibel per megliorar la situaziun. Ün dischloccamaint dals molocs nu vain in dumonda, quai our da motivs finanzials chi nu stan in relaziun.

Sala da la chasa cumünala Misoch / Tina Weiss – aquist d'ün spejel

M. Werro orientescha, cha duonna Tina Weiss, chi segna respunsabla pels cuors da ballar, prevezza d'acquistar ün spejel (paraid da spejel) per drivir e serrar (avert grondezza 300 cm x 18 cm / serrà – in trais parts 150 cm). Al cumün nu naschan ingüns cuosts per l'acquist dal spejel, quels surpiglia duonna Tina Weiss. Il Cussagl va d'accord cun quel intent metta però cundiziun cha'l cumün nu surpigl'ingüna resunsabilità per ev. dons e cha tuot tenor l'occorrenza in sala po quel eir gnir spostà in ün lö dadour la sala.

Scoula / nouv plan d'instrucziun 21 / Rumantsch Grischun

Il vicecapo, A. Poo, orientescha, cha la magistraglia nu va dal tuot d'accord cul nouv plan d'instrucziun ed ha decis da far adöver da la pussibilità da tour posiziun. Quella ais fingià redigida ed el tilla preschainta al cussagl. La magistraglia ed il cussagl da scoula han temma, cha cun quel plan pudess il Rumantsch Grischun gnir introdüt sco lingua obligatorica d'alfabetisaziun e cha lura nu füss plü garanti, cha l'alfabetisaziun i'l agen idiom gniss mantgnüda. Ultra da quai vain appellà al Chantun d'edir ils mezs d'instrucziun i'ls idioms. Cun quai va il cussagl d'accord.

Agricoltura / sauaziun

Il cusglier dal dicasteri, Men Caviezel, orientescha, cha la problematica a regard la sauaziun saja fich gronda. Id ais dumondativ, scha'l sistem installà gnarà a funcziunar, i sun dumondadas otras resp. ulteriuras masüras. Davo vasta discussiun vain il cussagl a la conclusiun da pretender dal büro respunsabel (Kindschi) ün aboccamaint cun tuottas parts pertocadas – paur, ameglioraziun incl. eir cul Chantun (sar Buschauer). M. Caviezel tegn'in ögl la fatschenda.

Corp da pumpiers

M. Caviezel infuormescha, chi detta müdamaints dal cader süls 6 november 2013. Sco nouv cumandant vain destinà Hans Andersag e sco vicecumandant Andri Planta.

Cità d'engergia

M. Caviezel manzuna, ch'a Untervaz haja lö üna dieta da barat per cumüns. El e Jon Carl Rauch prevezzan da far part a quella. Cun quai vain it d'accord.

Radunanza generala da la società da promoziun dal sport da skis (Skisport Förderverein), Ftan RPN 2013

Quella ha lö als 25 october 2013 i'l institut Otalpin Ftan.

InfoMedia / contribuziun sur da nos cumün illa televisiun

Sar Gustav Rady, vaiva visità d'incuort a nos cumün. El ha guadagnà bunas impreschiuns e vuless, sco cineast da films documentars, realisar alchünas sequenzas sur dals umans e da la natüra in ed intuorn Sent, scumparti süllas stagiuns da l'on. Ils cuosts per quel pitschen proget s'amuntan a max. fr. 5'000.00. Il Cussagl decida da desister da quel intent.

Canapè a Sent our in Plaz

In mardi, als 8 october avada la televisiun rumantscha (Armon Schleger) tuottadi a Plaz per rapportar e far intervistas culla populaziun da Sent. Il cussagl ais invidà da far part. Il capo ais insomma da la partida.

Proget infrastruttura Davo Stron

Il capo, A. Mayer, rend'attent ch'in lündeschdi, als 7 october vain cumanzà cullas lavuors da construcziun. L'administraziun dess publichar quai rendond attent sül fat, chi saja da quintar cun impedimaints.

694

VARIA

Ditta Bigler SA, char da sfradantar per prodots da charn

L'actuar orientescha, cha güst hoz haja la ditta manzunada infuormà in scrit, ch'a partir dals 7 october 2013 nu saja seis veicul plü plazzà a Sent. Ella ha chattà ün'otr'ocasiun, però in ün oter cumün, quai chi s'ignifich'üna perdita da creaziun a valur per nos cumün.

L'actuar:
Marco Fallet

Il Capo:
Albert Mayer